

雞肋集

濟北晁先生雞肋集目錄

第四十四卷

雜論

西漢雜論十四篇

濟北晁先生雞肋集目錄

終

濟北晁先生雞肋集卷第四十四

西漢雜論

宣帝卽位溫舒上書言宜尚德緩刑

云

秦有十

失其一尚存治獄之吏是也譽諛之聲日滿於耳
虛美熏心實禍蔽塞此乃秦之所以亾天下也夫
人情安則樂生痛則思死極楚之下何求而不得
故囚不勝痛則飾辭以視之吏治者利其然則指
道以明之上奏畏卻則鍛鍊而周内之蓋秦當之
成雖咎繇聽之猶以爲死有餘辜何則成鍊者衆

文致之罪明也上善其言遷廣陽私府長

右路溫舒傳第二十一班固以賈山鄒陽枚
乘路溫舒四人者傳相附以其上書論事類
也然山於孝文恭儉之主至借秦爲喻及諷
其與賢士共射獵雖憂深思遠有豫防之忠
而文帝亦何至是哉陽乘遊吳與梁不得已
而說而吳梁何足遊且說哉溫舒遇宣帝有
爲議與時會意刻覈之風其弊爲酷烈故深
指秦失而宣帝至是亦深見采納世被其利

過三人遠矣固之言曰山自下廟上陽樂遊
危國然卒免刑戮者其言正也溫舒辭順而
意篤遂爲世家宜哉是固於四人者未有間
也山陽樂皆浮於辭類非深切事情而溫舒
論失之存獨指獄吏與言虛美熏心實禍蔽
塞及獄吏成鍊之情可以爲百世戒確乎其
言如飢之粟病之藥也凜乎其志有治世大
臣之風矣固以其上書論事類乃溫舒言可
施於事非三人者之類也

上議置丞相太尉籍福說蚡曰魏其侯貴久矣素天下士歸之今將軍初興未如卽上以將軍爲相必讓魏其魏其爲相將軍必爲太尉太尉相尊等耳有讓賢名蚡迺微言太后風上於是迺以嬰爲丞相蚡爲太尉籍福賀嬰因弔曰君侯喜善疾惡方今善人譽君侯故至丞相然惡人衆亦且毀君侯君侯能兼容則幸久不能今以毀去矣嬰不聽夫出蚡遂怒曰此吾驕灌夫罪也迺令騎畱夫夫不得出籍福起爲謝案夫項令謝夫愈怒不肯順

蚡廼戲騎縛夫

右田蚡灌夫傳第二十二籍福似專爲蚡游
說者故其意每助蚡然教蚡以下嬰讓相則
智矣至說嬰兼容案夫使謝則無意於害竇
灌者蚡能用嬰夫不能用故蚡全而兩人死
也

淮南王安入朝時蚡爲太尉迎安霸上謂安曰上
未有太子大王最賢高祖孫卽宮車晏駕非大王
尚誰立哉淮南王大喜厚遺金錢財物上自嬰夫

事時不直蚡特爲太后故及聞淮南事上曰使武安侯在者族矣

右灌夫傳第二十二蚡嬰三人者皆召權利以氣相傾而交禍蚡雖免於誅而死不旋踵見怪物焉班固以謂凶德叅會其才不足相優劣也雖然嬰爲差賢其救夫死亦出於義何則方梁孝王倚太后愛而景帝未立太子酒酣上從容曰千秋萬歲後傳王太后驩嬰獨引卮酒進上曰天下者高祖天下父子相

傳漢之約也上何以得傳梁王太后由此憎
嬰及栗太子廢嬰爲傳又力爭不能得謝病
去嬰爲人臣於此亦足賢矣蚡以大臣當淮
南王以藩臣入朝迎安霸上乃私許安以宮
車晏駕而立安夫爲人臣如此而不族豈不
幸哉武帝英主自初卽位故已嫉蚡專曰君
除吏盡未吾亦欲除吏又曰遂取武庫及東
朝廷辯內史是魏其後不堅上罵內史曰吾
并斬若屬矣則帝意直嬰無意族夫可知徒

以黽俛從太后而兩人族嗟乎人君雖謹於
奉親而族人之家刑亦可以濫設哉至淮南
王反乃始歎息謂蚡在當族然亦竟不正蚡
罪非也

梁王以至親故得自置相二千石出入遊戲僭於
天子天子聞之心不善太后知帝弗善迺怒梁使
者弗見安國爲梁使見大長公主而泣曰何梁王
爲人子之孝爲人臣之忠而太后曾不省也

云

公孫詭羊勝說王求爲帝太子及益地事陰使人

刺漢用事謀臣及殺故吳相爰盎

云云

景帝遣捕詭

勝必得安國聞詭勝匿王所廼入見王而泣曰主

辱者臣死大王無良臣故紛紛至此今勝詭不得

請辭賜死王曰何至此

云

安國曰今大王列在

諸侯詠邪臣浮說犯上禁撓明法天子以太后故

不忍致法於大王幸大王自改大王終不覺寤

云

云

右韓安國傳第二十二漢初接秦雖經術粗

亾然卿大夫論事猶習捭闔務以奪人梁王

倚帝弟僭踰而安國稱其忠孝以解上意而
全梁意雖愛主然梁安得爲忠孝哉非正論
也然使安國非君子愛人以姑息而已者耶
則進爲罔上退亦適足以驕王而未足以全
梁至勝詭爲姦而安國正色不撓諭以禍福
明甚王雖驕卽知懼而出勝詭使天子全兄
弟愛而梁以安益爲漢語則佑梁爲梁語則
尊漢然則安國非愛人以姑息者也謀也

安國坐法失官家居武帝卽位田蚡親貴用事安

國以五百金遺蚡蚡言安國太后上素聞安國賢
卽召以爲北地都尉遷爲大司農其年蚡爲丞相
安國爲御史大夫

右韓安國傳第二十二漢賢臣如安國者少
安國而賄況其下者哉

趙王彭祖薨時淖姬兄爲漢宦者召問淖子何如
對曰爲人多欲上曰多欲不宜君國子民問武始
侯昌何如曰无咎無譽上曰如是可矣遣使者立
昌

右景十三王傳第二十三趙敬肅王傳傳曰
無德而富貴謂之不幸王同姓非以賢勞也
若武帝之言所以親其族而保全之至矣必
才者耶地大力豐則叛否則以奢淫敗昌無
行事記立與薨而已此武帝處之得也

武帝初卽位大臣懲吳楚七國行事議者多寃鼂
錯之策皆以諸侯連城數十秦彊欲稍侵削數秦
暴其過惡諸侯王自以骨肉至親

云

云

今或無罪

爲臣下所侵辱有司吹毛求疵笞服其臣使證其

君

云

建元三年中山靖王勝來朝天子置酒勝

聞樂聲而泣

云

具以吏所侵聞於是上乃厚諸

侯之禮省有司所奏諸侯事勝爲人樂酒好內有
子百二十餘人

右景十三王傳第二十三中山靖王勝傳厚
親親之禮王者之盛德也然漢諸侯皆奢淫
不循制故黷錯議削於其前主父定制於其
後猶不能救武帝感勝之言而隆私恩在武
帝得親親之禮矣而勝樂酒好內至有子一

百二十餘人外浮辯而內濟姦欲勝不足道也

去爲望卿作歌曰背尊章嫖以忽謀屈奇起自絕行周流自生患諒非望今誰怨昭信欲擅愛請閉諸姬去怜之爲作歌曰愁莫愁居無聊心重結意不舒內弗鬱憂哀積上不見天生何益日崔隤時不再願棄軀死無悔

右景十三王傳第二十二去附傳去犬彘行燔燒烹煮生割剝人大惡仍重不足汙冊牘